



Senin, 01 Agustus 2022
Ogen: Esekiel 45:7-8



"Taneh si Badia"



Tujuan Dibata njadikan kerinana si lit i doni enda, termasuk taneh e me gelah kerina rubia-rubia, sinuan-sinuan dengen manusia nggeluh alu dame dengen meriah. Arah taneh, Dibata ersura-sura njadikan manusia gelah manusia njagai dengen ngusahai alu payo ras mehuli. I bas kinatana megati taneh e njadikan keluarga lanai siangkan, rubati perkara pembagin si la adil dengen payo, sierbahansa hubungan sada ras sidebanna pe nggo sontar. Taneh tading-tadingen si arusna jadi ulu keriahen i bas jabu, suku, marga, kuta piahna nggo man perubaten.

Dibata nggo ngadi nepa taneh; tapi manusia si tading i babo taneh siitepa Dibata reh buena, encidahken maka taneh si nggo ilitken e arus pentar makekenca bage pe mbagikanca. Esekiel 45:7-8 si jadi bahan paksa tenengta wari enda, mabai dengen mpersingeti kita gelahna nambah pengangkanta kerna erti pemere Dibata i bas bentuk taneh, husus i bas ayat 7b isingetken "*..., seh maka taneh si man raja e bali gedangna ras taneh si ibagikan man sada suku Israel*". Ertina maka "penguasa" si lit, baik i bas kuta (tanah kuta=seri hak pakai man kerina masyarakat) kuta, i bas jabu/keluarga (tanah tading-tadingen=bali hak anak dilaki ras anak diberu i bas ngaloken tading-tadingen orangtua, aminna gia liten hak anak dilaki buen asangkan anak diberu. Esekiel ningetken maka sekalak raja/penguasa arus mbagikan taneh alu payo rikut pe ras baleng-balengna man bangsa Israel.

Tanah si Badia e me tanah pemere Dibata. Pakekenlah tanah e alu badia gelah la maba perpecahen ku bas tengah-tengah jabu, keluarga bage pe masyarakat. Pakeken ras usahailah tanah e alu mehuli dengen payo gelahna tanah e mereken tuah man kalak si tading dengen er-usaha i je. Berekenlah hak man kalak si ngaloken hakna selaku anak, anak kuta/masyarakat gelah radu sikap ngiani tanah si Badia e.